



Inatsisartuni ilaasortaq Laura Táunâjik, Siumut
/MAANI

Inuusuttuaqqanut piniarnermut allagartanik piniarnermullu pisassiissutinik tunniussisarnermut tunngatillugu § 37 naapertorlugu Naalakkersuisunut apeqqtup nr. 208-p akineqarnera

Inatsisartut suleriaasianni § 37, imm. 1 naapertorlugu piniarnermut allagartanik piniarnermullu pisassiissutinik tunniussisarnerit pillugit Naalakkersuisunut apeqquteqarsimavutit. Apeqqtut uanga suliaasaqarfigisannit akineqartussanngorlugu innersuunneqarpoq.

1) Aqqaneq marlunnik ukiullit aallaaniarsinnaanermut allagartalersinnaanerata sunarpiaq tunngavigaa?

1-imut) Kalaallit Nunaannut Pinerluttulerinermik Inatsimmi 2008-meersumi § 90, imm. 1 naapertorlugu meeqqat aqqaneq-marluk inorlugit ukiullit aallaammik tunineqassanngilat. Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-meersumi kingullermillu 2008-mi allangortinneqartumi inuusutissarsiuutigalugu piniarsinnaanermut allagartanik imaluunniit saniatigooralugu piniarsinnaanermut allagartanik kikkut tunineqarnissaat pillugit ukiunik killiliinermik allassimasoqanngilaq. Pinerluttulerinermik Inatsit tunngavigalugu piniarsinnaanermut allagartanik tunniussinissami ukiunut killiliunneqartoq aqqaneq-marlunnut Naalakkersuisuniit aalajangerneqarsimalluni.

2) Inatsisip qulaani apeqqtigisama allangortinnissaanut iliuusissamik nutaamik Naalakkersuisut pilersaaruteqanngillat?

2-mut) Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik Kalaallit Nunaannut pinerluttulerinermik Inatsimmut oqartussaaffittut akisussaasuvoq. Naalakkersuisoqarfillu nalunaarpoq Danmarkimi Justitsministeeriaqar-fik suleqatigalugu pinerluttulerinermik Inatsit misissorlugu aallartissimagitsik, ukiunullu killiliunneqartoq allanguutissanut ilaasinnaassasoq.

Aalisarnermut Piniarnermullu Naalakkersuisoqarfimmi (APN) piniarneq aallaaniarnerlu pillugit Inatsit misissorlugu aallartinneqarsimavoq, tassanilu ukiunut killiliussa qamma misissorneqarpoq.

3) Sulisartut saniatigooralugu piniartut qanigisaminnit aqqaneq marluleereersimasunik piniagassanik angisuunik qinnuteqartitsisarnerat immikkut qanoq iliuseqarfiginissaannut Naalakkersuisut piumassuseqarpat?

- Taamaassimappat: Qanoq aaqqissuuseqqinnissaq pilersaarutaava?

- Taamaangippat: Suna tunngaviulluni allangortikkumaneqanngila?

Ulloq: 05-09-2017
Suliap normua: 2017 -
18932
Akt nr.: 6044143

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

3-mut) Aalisarnermut Piniarnermullu Naalackersuisoqarfik pisanik nalunaarsuiffinni paasissutissanik piviusunik aallaaveqarluni kisimi sulisinnaavoq, akissarsiallit saniatigooralugu piniartut qanigisaminnit aqqaneq marluleereersimasunik piniagassanik angisuunik qinnuteqartitsisarnerat pillugu ilisimasaqanngilaq. Piniarnermut allagartallit ataasiakkaat kommuni najugaqarfigisartik aqputigalugu piniakkanik killilersukkanik qinnuteqartarput.

2013-imiit 2017-imut inunnut 16-it inorlugit ukiulinnut inuussutissarsiutigalugu piniarsinnaanermut allagartanik arfineq-marlunik tunniussisoqarsimavoq (pingasut 14-inik ukiulinnut sisamallu 15-inik ukiulinnut). Ataaseq minillugu tunineqartartut tamarmik Tunumi najugaqartuupput. Nanoq ataasiinnaq minillugu uumasunut pisassiissuteqarfigineqanngitsunut aamma akuersissuteqarfigineqanngitsunut, pingaartumik puisit, nalunaartoqartarsimavoq.

2013-imiit 2017-imut inunnut 20-nut 12-nik ukiulinnut aamma inunnut 120-nut 16-it inorlugit ukiulinnut saniatigooralugu piniarsinnaanermut allagartanik tunniussisoqarsimavoq. 12-nik ukiullit amerlanerpaartaat Nunatta kitaata avannaaneersuupput. Aammaarluni qilalugaq qernertaq ataaseq eqqaassanngikkaanni taakku amerlanertigut uumasunik pisassiissuteqarfigineqanngitsunik akuersissutitalerneqanngitsunillu nalunaaruteqartarsimapput.

Akuersissutit inunnut ataasiakkaanut tunniunneqartarmata, inatsisillu atuuttut malillugit allanut tunniuteqqusaanngimmata, inunnut 12-nik ukiulinnut akuersissutinik tunniussisarnernut imaluunniit uumasunut akuersissummik peqaqqaarluni piniagassanut misissuinissap pisariaqartinneranut tapersersuisumik tunngavilersuinissamut atugassanik paasissutissanik kisitsisinillu Aalisarnermut Piniarnermullu Naalackersuisoqarfik peqanngilaq.

Uumasunut ataasiakkaanut tunngatillugu (tuttut umimmaallu) akuersissutinik tunniussisoqassappat nalunaarummi 16-inik ukioqalereersimanissaq allassimavoq.

Paasissutissat piviusut taaneqareertut tunngavigalugit Naalackersuisut immikkut pilersaarusiornissamik pilersaaruteqanngillat.

4) Piniartunngorusullutik allagartartaarusuttut sumiiffimminni Piniartut Peqatigiif-feqanngittumi qanoq iliorlutik kimullu saaffiginnillutik atsiortitsisinnaappat?

4-mut) Inatsisit atuuttut malillugit piniarsinnaanermut allagartanik tunniussinissami najukkani piniartut peqatigiiffiik ilaatitsisarnissaq tusarniaasarnissarluunniit piumasaqaataanngilaq. Aamma piniarsinnaanermut allagartamik tunniussisoqarnissaani piniartut peqatigiiffiitut ilaasortaanissaq piumasaqaataanngilaq.

Inuussutissarsiutigalugu piniarsinnaanermut allagartat pillugit immikkut akuersissuteqartoqarnissaanik qinnuteqartoqartillugu najukkani piniartut peqatigiiffii tusarniaaffigarnissaat Aalisarnermut Piniarnermullu Naalackersuisoqarfiup kommunillu ukiuni arlalinni toqqarsimavaat. Taakkuuppummi qinnuteqartup suna pillugu inuussutissarsiutigalugu piniarsinnaanermut allagartamik tuneqqinnissaanut inatsisitigut piumasarineqartunik atuuttunik eqqortitsisinnaannginneranut najukkaminni ilisimasaqartuusut. Imaluunniit suna pillugu piniartoq nutaaq siullermeertumik inuussutissarsiutigalugu

piniarsinnaanermut allagartaq pillugu immikkut akuersissuteqartoqarnissaanik qinnuteqarsimasoq tunisariaqarnersoq.

5) Angallateqaratik piniarnermut allagartartaartinneqartartut sunarpiaq tunngavigalugu akuersissummik tunineqartarpat?

5-imut) Soorlu 2-mut)-mi taaneqartoq piniarneq aallaaniarnerlu pillugit Inatsimmik Aalisarnermut Piniarnermullu Naalackersuisoqarfik allanngortiteraluni aallartisisimavoq. Tassanilu sunik atortoqarsinnaanermut inatsisitigut tunngavissaq ilaatinneqarpoq. Qinnuteqartoq najugarisamini inuussutissarsiutigalugu piniartutut inuuniarnissamini atortunik pisariaqartitaminik pissarsisinnaasariaqarpoq.

Massakkut immikkut akuersissuteqartoqarnissaanik qinnuteqaat tiguneqaraangat naalackersuisoqarfiup iluani maleruagassat aallaavigalugit naalackersuisoqarfik sulisarpoq. Taamaaliornikkut qinnuteqaatit tamakkerlugit assigiimmik ammasumillu suliarisarnissaat qulakkeerneqartarpoq. Naliliiniarnermi ilaatigut atortunik pissarsisinnaanermut, pisariaqarpat atortunik piginnittuuneq ilanngullugu, atortunik piginnittuunermut, misilittagaqarnermut, ilinniartinneqarsinnaanermut periarfissat sunalu pillugu qinnuteqartup siunissami inatsisini piumasarineqartunik naammassinnissinnaanera pillugit paasissutissat ilanngunneqassapput.

Inussiarnersumik inuulluaqqusillunga

Karl-Kristian Kruse
Aalisarnermut Piniarnermullu Naalackersuisoq